

ARRÜNA PRIMER ÑACONOMOSORRTI SAN PABLO ÜMOTI TIMOTEO

1 ¹Arrüñü Pablo apóstol ñü ümoti Jesucristo auqui noñemarrti Bae Tuparrü, naqui uiche utaesübuca eanaqui nomünantü. Apostól ñü auqui noñemarrtito Señor Jesucristo, naqui ümoche nubarrüperaca, nauqui urria nosüboriqui. ²Rraconomoca tanu aemo Timoteo. Sobi aicococati Jesús. Tari icunusüancantiyü Tuparrü, naqui uyaü y arrti Jesucristo. Tari pucürurati atacucü y taiquiana urria naca.

Arrübama manunecana chomirriampü

³Numo ñasamuca nariorrü aemo, nauquiche niyüciü aesaquiciü au Macedonia, sucanañü nurria aemo, nauqui asiquia au manu pueblurrü Efeso, nauqui tapü asiomainqui manuma mañanunecaca aübu arrüba chomirriampü ñanunecacarrüma. ⁴Sucanañü ito nauqui ucanü ümoma tapü manunecanamainqui arrüba cuentuca, chümutacümununaumpü icütüpü bama antiburrü tücañe. Oboi ba manunecatata uratoquiomantai. Oboi chüpuerurrüpi atusi oemo arrüna nirrancarrti Tuparrü. Pero arrtü uicococati, tusio oemo arrüna nirrancarrti. ⁵Ucanü ümoma tari ñanunecanama nauqui acuama ümomantoe, y tapü mapensarama ümo arrüba chomirriampü. Tari isamutema urria auqui nausasürrüma, y tari oncomatü ümoti Jesús aübu narucurrü ümoma. ⁶Aboma bama iñocotama arrüna urria manunecatarrü itopiqui arrüna arrüchopüratai manitacaca. ⁷Urapoimia que ipiacama anunecama nürriacarrü uiti Moisés, pero ta chütusiopü ümoma manu nürriacarrü, ni atusipü ümoma isane arrüna urapoimia. Pero ta manunecanamantai aübu narucurrü ümoma.

⁸Ta urriampaepü manu nürriacarrü torrio uiti Moisés. Pero tiene que atusi oemo ümoche aitorrimiatü Tuparrü. ⁹Arrümanu nürriacarrü champürrtü ümo bama urria ñapanauncurrüma, ta ümo bama chicocotapüma, ni macoconaurrüpüma

ümoti Tuparrü, y ümo bama chisuputaramatipü, y ümo bama ane nomünantü uimia, ümo bama champü nümocheti Tuparrü uimia, ümo bama churriampatai ñanitacarrüma, ümo bama mayatabayoca, ümo bama batabayoma yaüitorrüma y nipiactüorrüma. ¹⁰Arrümanu nüriacarrü torrio ümo bama bavivicoma tacana numuquianca, y ümo arrübama maññünca ichüibomactü ümomantoe, ümo bama cusüpiüoma, y ümo bama mañapanca y ümo namanaiña bama isamutema aruqui nanaiñantai nomünantü. ¹¹Nanaiña arrüba nomünantü chisiupü tacana arrüna urriantai manunecatarrü icütüpüti Tuparrü oemo. Arrti icüpurutiñü suraboi au nanaiñanti arrüna urriantai manitacarrü.

Machampienecatarrü ümoti Tuparrü itobo arrüna chiyaupü nibuenucurrti

¹²Ñachampienecaca ümoti Señor Jesucristo, itopiqui bacheboti isusüubunü nauqui yaserebi ümoti. Bacheboti rratrabacaboñü y bien buenurrti saübuñü. ¹³Champüquito nümoche uiti arrüna churriampü nirranitaca ümoti tücañe, y arrüna nitaquisürücürüma sobi tücañe bama icocoromati. Chauqui tirrimiacana uiti arrüna nomünantü sobi, itopiqui chütusiopü iñemo arrüna niyachücoi tücañe, nauquiche chisuputacatiquipü Jesús. ¹⁴Bien buenurrti Tuparrü saübuñü. Uiti te cuasürüti iñemo Cristo Jesús. Uitito Tuparrü ñoncatü ümoti.

¹⁵Ane manu ñemanauncurratoe manitacarrü, urria arrtü uicocota: Arrti Cristo Jesús cuati tücañe icu na cürri, nauqui ataesümunucuti eanaqui nomünantü ümo bama ane nomünantü uimia. Arrüñü tücañe tarucu nomünantü sobi. ¹⁶Pero caüma tarucu nisua ümoti Tuparrü. Rranrti aitusiancati au nisüboriqui arrüna tarucu nibuenucurrti Jesucristo. Sobi tusio isane naca genterrü oncomatü ñana ümoti, nauqui atorri isüboriquiboma ümo para siempre. ¹⁷Tapü tacürusu numapanauncu y numachampienecaca ümoti. Itopiqui champü nitacüru nüriacarrti. Chüpuerurrüpi basarati, pero chücoiñotipü, y tonenti naqui cunauntañantai Tuparrü naqui chütacürusupü ñapanauncurrti.

¹⁸Tone nisura aemo, saruqui Timoteo. Sane ito nurarrüma tücañe bama manitanama aemo uiti Tuparrü. Aquionsü iyo nurarrüma, nauqui ane nurria nacüsü ümo natrabacaca ümoti Tuparrü. Ahi tacanati sortaborrü ümo nomünantü aübu narucurru aemo. ¹⁹Tapü aiñocota nacoconauncu ümoti Jesús. Asasai nurria, aisamuse arrüba omirria. Tapü pasabo tacana bama iñocotama ñacoconauncurrüma ümoti Jesús yotopiqui ba chomirriampatai isamutema, abu tusiatai ümoma que churriampü. ²⁰Sane pasabo ümoti Himeneo y ümoti Alejandro. Sane nauquiche itorrimiacama ümoti choborese, nauqui ataquisürüma uiti. Uí arrüna sane caüma tochenca ñanitacarrüma churriampü ümoti Tuparrü.

Manunecatarrü ümo noñeanca

2 ¹Suraboirra nirracüpu ümo bama icocoromati Jesús: Apean itacu namanaiña macrirrtianuca. Apanqui pünanaquiti Tuparrü, nauqui ayurati

ümoma. Apachampienca ito ümoti itobo arrüna yayuracarrti ümoma. ²Apean ito itacu namanaiña bama mayüriabuca, y itacu nanaiña nüriacaca, nauqui urria nosüboriqui ümoti Tuparrü y ümo ito genterrü. Champü causane. ³Arrtü uisamute arrüna sane, pucünüñati Tuparrü usaübu, naqui uiche utaesübuca eanaqui nomünantü. ⁴Ta arrti rranrrtito nauqui nanaiña genterrü icu na cürri taesüburu eanaqui nomünantü, y aye uirri arrüna ñemanauntu manunecarrtü. ⁵Anati tamantiatai Tuparrü naqui ñemanauncurratoe, y anatito tamantiatai ñoñünrrü naqui uiche puerurrü aye osoi esati Tuparrü, ta arrti Jesucristo. ⁶Artri itorrimianatiyü na aconti ui nirrancarrti, nauqui utaesübu eanaqui nomünantü. Pasabo arrüna sane au manu tiemporrü ensümunu uiti Tuparrü. Chauqui tütusio au nanaiñantai. ⁷Sane nauquiche iñanatiñü ümo nesartri apóstol, nauqui surabo arrüna urriampae manitacarrtü isucarü bama chütüpü israelitarri. Ñemanauntu arrüna sucanañü, itopiqui icococati Cristo. Chirrapancapü.

⁸Sane nauquiche caüma irranca nauqui eama bama mañoñünca au nanaiñantai auna cauta oberabarama, aübu ñacampequírrimia nipiarrüma, y aübu arrüna urria ñapensacarrüma. Tapü uratoquioma, tapü tüboricoma ümomantoe. ⁹Arrüba paüca tari urria ñupanauncurrü, tari ubaibio nurria. Tapü tarucapae niyupabacarrtü ümo niñutanurrü. Tapü tarucu niñupacoñocorrü ñomeantoe ui oro y perlarrü y arrüba ubaibibo tarucu niyucuarri. ¹⁰Tari opisamunena arrüba omirria, na atusi que arrio opicocoroti Tuparrü. ¹¹Tari omonsapera auna cauta oberabarama, nauqui aye oboi nurartri Tuparrü, y tari pacoconaurrü ümo nanaiña. ¹²Chütorriopü ñome apanuneca. Chüpuerurrüpitö nauqui ane nobüriacarrtü ümo mañoñünca. Tari ametaiyoi. ¹³Itopiqui artri Adán cusürüboti tücañe urriancati uiti Tuparrü pünanaqui Eva. ¹⁴Champürtrü artri Adán naqui batacheboti ui manu macocotorrü, si no Eva batachebo ui manu macocotorrü churriampü ui noirrobörri, sane nauquiche isamute nomünantü. ¹⁵Sane nauquiche artri Tuparrü bacheboti yutaquisürücübo ba paüca, arrtü ane omemecu. Pero arrtü omoncatü ümoti Jesús, butaesüburu auqui nomünantü, arrtü urria ñupapensacarrtü y urria niyosüboriquirri, y buenurrio aübu genterrü.

Arrüna nisüboriqui bama mayorerri

3 ¹Ñemanauntu arrüna manitacarri: Arrübama rranrrü asaratü itacu bama icocoromati Jesús, urriampae ñapensacarrüma. ²Artri naqui rranrrü aserebiti itacu bama icocoromati Jesús tapü ane nipünatenti au nanaiña nisüboriquirri. Tari ane tamantai nicüpostoti. Tari urria ñapanauncurrü. Tari buenurtri ümo namanaiñantai. Tari yasuriurati nurria au niporrti ümo bama bapasearama ümoti. Tiene que aipiati nurria anunecati. ³Tapü yorisüborrti. Tapü yapachertri chürüri. Tari ñasamunaunati aübu genterrü aübu nibuenucurrü. Tapü tarucu nirrancartri ümo monirri. ⁴Tiene que aipiati nurria anunecati nomirria ümo bama aübosirri, nauqui ane ñanauncurrüma ümoti, y macoconaurrüma. ⁵Itopiqui arrtü chipiacatipü anunecati ümo bama aütorrti au niporrti, ¿causanempü aipiati anunecati ümo bama icocoromati Tuparrü?

⁶Chüpuerurrüpi mayorerri naqui aübatái aicocorotiti Jesús, tapü vanurrti aübu nurarri Tuparrü, y tapü cuatü carrticurrü ümoti tacana arrüna pasabo ümoti choborese tücañe. ⁷Umo arrüna trabacorrü tiene que atacümanauncuti naqui urria nisüboriquirri ümo bama ito chisuputaramatipü Tuparrü. Sane nauqui tapü bacheboti choborese macocotorrü ümoti.

Arrüna nisüboriqui bama bayurara

⁸Sane ito arrübama bayurara ümo bama icocoromati Jesús, tari urria nisüboriquirrimia, nauqui puerurrü oñoncatü ümo nurarrüma. Tapü orisübaboma y tapü rranrrüma acanamantái monirri auqui yaserebiquirrimia. ⁹Tari icocotama aübu narucurrü ümoma arrüna ñemanauncurratoe nurarri Tuparrü, arrüna torrio uiti ümoma. ¹⁰Antes que asuriuma manu cargorrü tari yaserebirama baeta, nauqui atusi arrtü urria yaserebiquirrimia. Arrtü urria, auqui caüma torrio ümoma cargorrü. ¹¹Arrüba nicüpostorrüma tari urria niyosüboriquirri. Tapü papario churriampatai. Tari pacumanaunrrü y tari opisamunena arrüba nomirria. ¹²Arrübama bayurarama ümo bama icocoromati Tuparrü tari ane tamantái nicüpostorrüma y tiene que aipiama nurria anunecama nomirria ümo bama aütorrüma au niporrüma. ¹³Itopiqui arrtü urria niyaserebiquirrimia, ane manauncurrü ümoma ui maquiataca, y puerurrü anitama aübu narucurrü ümoma, itopiqui oncomatü nurria ümoti Tuparrü.

Arrüna numanauncu ümoti Tuparrü

¹⁴Irranca yero tanu contoatai. ¹⁵Pero rrepente chiñataipü tanu conto. Sane nauquiche rracüpuca aemo arrüna nirraconomoso, na atusi aemo causane nosüboriqui aübu bama icocoromati Tuparrü. Tonema bama uiche atusi arrüna ñemanauncurratoe nurarri Tuparrü icu na cürrü. ¹⁶Urriampae nosüboriqui aübuti Tuparrü. Pero arrübama chicocoromatipü chütusiopü ümoma. Tapü arroñü tusio oemo arrüna sane:

Artri Cristo isamunutiýü ñoñünrrü.

Enterurrü nisüboriquirri urria, itopiqui artri Espíritu Santo anati auti.

Arrübama angelerrü asaramatü ümoti.

Arrübama macrirrtianuca icu na cürrü oncoimia nürirri.

Sürümanama bama icocoromati.

Süroti tato au napese auna cauta chücupiusupü nanentacarri.

Arrübama manunecana mapancarrü

4 ¹Pero artri Espíritu Santo urapoiti nurria arrüna sane: Aboma ñana bama iñocotama arrüna ñemanauntu manunecatarrü arrüna uicocota. Onsapetioma manunecatata ui bama manitanama uiti choborese. Batachoboma ui ñanunecacarrüma machoboreca. ²Itopiqui arrübama ñanunecasarri choborese mapañamantái, champü nümoche uimia arrtü

urria o churriampü arrüna yachücoimia. ³Chichebopü uimia nauqui apoma macirrtianuca. Chichebopito uimia nauqui aama arrüba pemacaca, abu omirriante uiti Tuparrü ümo namanaiña bama icocoromati y bama tusio ümoma arrüna ñemanauncurratoe nurarrti. Torrio uiti te nauqui umane aübu numachampiencaca ümoti. ⁴Itopiqui nanaiña arrüna urriante uiti Tuparrü, ta urria, champü arrüna churriampü. Sane nauquiche machampiencana ümoti itobo nanaiña arrüna torrio uiti oemo. ⁵Arrtü maquionca oñü iyo nurarrti Tuparrü antes que uba aübu noñeanca, icunusüancatati arrüna umate.

Arrti naqui urria yaserebiquirrti ümoti Cristo

⁶Arrücü Timoteo, urriampae naserebiqui ümoti Cristo Jesús, arrtü urapoi arrüna sane isucarü bama usaruquитайqui. Chauqui te tasutiu arrüna urria manunecarrü, itopiqui taicococati Jesús. ⁷Tapü ane nümoche obi arrüba cuentuca chomirriampü, arrüba champü niyupaserebiquirri. Tari manrrü cuasürü aemo arrüna urria nosüboriqui aübuti Tuparrü. ⁸Urriantai arrtü uiñununecata nocütüpü nauqui acusüu. Pero manrrü urria arrtü uicoñocota nosüboriqui aübuti Tuparrü, itopiqui arrti bayurarati oemo auna icu na cürü y ñana ito arrtü oecatü esati au napese. ⁹Ñemanauntu arrüna manitacarrü, urria arrtü uicocota nanaiña oñü. ¹⁰Ümo te fuerte nurria nubatrabacaca, nauqui usuraboi arrüna manitacarrü. Oñoncatü ümoti Tuparrü, naqui süborico, naqui asaratü itacu namanaiña macirrtianuca icu na cürü. Mataesümunucunuti ümo bama icocoromati ñünana carrticurrü.

¹¹Anuneca arrüna sane aübu narucurrü aemo. ¹²Tapü ane nümoche obi, arrtü unumacü ui arrüna yaürrücüqui. Aisamuse urria nasüboriqui aübu nanitaca, y aübu ito nanaiña arrüna nachücoi. Tari cuasürüma aemo bama usaruquитайqui. Onsotü ümoti Jesús. Arrtü aisamute sane, isamutema isiu bama maquiataca. ¹³Mientras chiñataiquipü tanu, tari lehebecü nurarrti Tuparrü icuqui Nicororrü isucarü macirrtianuca. Aicuan somocosama y anuneca nurria ümoma. ¹⁴Torrio aemo tücañe üriacabo uiti Tuparrü, nauqui aserebi ümo bama usaruquитайqui. Torrio aemo numo iñatama atacü nehesüma bama mamayoreca. Arrüma oncoimia nurarrti Tuparrü y urapoimia asucaüci. Sane nauquiche caüma aserebi te nurria aübu na nüriaca.

¹⁵Aiña nurria aübu nanaiña narucurrü aemo, nauqui atusi que manrrü iyebo obi nurarrti Tuparrü. ¹⁶Asasai nurria, nauqui aisamune arrüba omirria, y nauqui anuneca arrüna urria. Arrtü sane obi, taesüburuma eanaqui nomünantü bama onsapetioma nura.

Arrüna nosüboriqui aübu bama icocoromati Jesús

5 ¹Tapü apatairriquia aübu nura ümo bama mapomanca. Sino tari urria nanitaca aübuma, tacanarrtü anitaca aübuti aüma. Tapü ümo bama mayatica anita aübuma tacanarrtü anitaca ümoti aruqui. ²Ñome pocüposümanca

anita ito tacanarrtũ anitaca ũmo napaćũma. Arrũba cupiquiquia anita ñoma tacanarrtũ anitaca ũmo naquiasi, y tari taiquiana urria napanauncu ubaũbu.

³Ayura ito ñome biuraca, arrũba champũqui niyobesarrũ familiarrũ y champũ isane ñome. ⁴Pero arrũna biurarrũ abomainqui aũrrũ y bama iquiarũtorrũ, arrũma tari yayurarama ũmo aũbu nicuarrũ ũmoma itobo nanaiña arrũba omirria y nibuenucurrũ torrio uirri ũmoma tũcañe, numo matĩbo nisunaunrrũma. Ui arrũna sane pucũnuñati Tuparrũ icuatama, arrtũ isamutema sane. ⁵Pero arrũba biuraca champũmainqui ipiarientese, omoncatũ ũmoti Tuparrũ. Opeabo ũmoti naneneca y tobiquia, nauqui ayurati ñome. Tari yayurarama ñome bama icocoromati Jesús. ⁶Pero abe ito arrũba biuraca pavivico isiu niñurrancarrũ, murrianrrũ naneneca ane pierrta. Arrio abe tacanarrtũ tũmocoliño au narrtarri Tuparrũ. ⁷Sane nauquiche anuneca nurria ũmo bama masaruquitaĩqui, nauqui atusi ũmoma arrũna urria yachũcoboĩboma, nauqui tapũ anati naqui manitana churriampũ ũmoma. ⁸Tapũ arrti naqui chũbayuraratipũ ũmo bama ipiarientetorrũ y ũmo nesarri familiarrũ, mapancarrtai arrũna ñacoconauncurrũ ũmoti Tuparrũ. Manrrũ churriampũ caũma nacarrti pũnanaqui bama chisuputamatiptũ Tuparrũ.

⁹Aiconomo nobũri biuraca arrũba ane sesenta añorrũ ñome, y tamantai ñopiquianio tũcañe, nauqui ayurama ñome arrũbama icocoromati Jesús. ¹⁰Anquisio pũnanaqui genterrũ arrtũ urria tũcañe niyosũboriquirri, y sunauma nurria oboi bama ubaũbosirri, y pasutiu au niyoporrũ ũmo bama bapasearama auqui iche, y paserebio ũmo bama icocoromati Jesús y ũmo bama taquisũrũ, y apisamute aruqui nanaiña nomirria.

¹¹Pero arrũba biuraca chĩnataĩquiptũ niyubarusũrũcũrrũ, tapũ aiconomoquio, itopiqui arrio murrianrrũ aupo tatito y puerurrũ apiñoco ñupacoconauncurrũ ũmoti Cristo. ¹²Ui arrũna sane ane nopipũnate, itopiqui chũcoconopũ nuburarrũ ũmoti Cristo tũcañe. ¹³Manrrapae arrtũ omenotũ au piquiatata poca, nauqui apapari ausũratai, niñurrancarrũ atusi ñome nanaiña piaracaca. Panitana ito arrũba churriampũ, y sane ito ane nomemarriquiatarri. ¹⁴Sane nauquiche irranca nauqui aupo tatito arrũba biuraca cupiquiquiaĩqui, nauqui abe nubaũbosirri tatito, nauqui amasaratũ itacu niyobesarrũ familiarrũ. Ui arrũna sane chũmanitanapũma macrirrtianuca chomirriampũ ñome. ¹⁵Sucanañũ sane, itopiqui tũtabe arrũba biuraca mameso ñupapanauncurrũ. Tomenotũ isiuti Satanás, naqui choborese.

¹⁶Sucanañũ tatito: Arrtũ ane taman biurarrũ aboma bama ipiarientese, tari yayurarama ũmo, tapũ oncomatapae ũmo bama icocoromati Jesús. Arrũbama icocoromati Jesús tari yayurarama ñome ba biuraca champũ niñuparientese.

¹⁷Tari yapacarama nurria ũmo bama mamayoreca, bama asaratũ itabu bama icocoromati Jesús. Arrũma urapoimia y manunecanama nurarrti Tuparrũ aũbu nanaiña narucurrũ ũmoma. Tari ane napanauncu ũmoma. ¹⁸Nantũ sane icu Nicororrũ: “Tapũ aĩñata bosal ũmo buyese, arrtũ batrabacara aemo”. Ane ito coroba sane: “Tari apaca ũmoti naqui batrabacara aemo”.

¹⁹Tapũ asiquia onsaperio, arrtũ anati naqui urabotiti tamanti uturuqui bama mayorerrũ, bama asaramatũ itacua bama icocoromati Tuparrũ,

mientras champü torrü materrticuca o trerrü, nauqui atusi arrtü ñemanauntu. ²⁰Arrtü ane nipünatenti, aicunsomocorrü isucarü bama maquiataca, tapü isamutema tacana arrüna yachücoiti. ²¹Tone nirrácüpucu aemo isucarüti Tuparrü, isucarütito Señor Jesucristo, y isucarü bama nesarrü angelerrü: Aisamuse isiu arrüna nirrácüpucu. Tapü apensaca quiatarrü. Tapü anati naqui cuasürüti manrrü aemo pünanaquiti quiatarrü. ²²Tapü contoatai asuquiucama mañonünca au nürirrti Tuparrü aübu nehe itama, nauqui aserebimia ümo bama icocoromati Tuparrü. Rrepente aninqui nipünatema arrüna chütusiopü aemo. Asasai nurria arrüna sane, tapü ane naipünate ichepema.

²³Tapü achaca turrütaí. Acha ito taiquiana chimiantai vinorrü, itopiqui orrosa naquiporo; uirri arrüna chacusüucapü.

²⁴Aboma bama macrirrtianuca tusiatai nomünantü uimia. Tütusiataito que cuatü ñana carrticurrü ümoma. Aboma bama anecanatai nomünantü uimia, pero tusioqui ñana. ²⁵Isiatai ui bama urria ñapanauncurrüma, tusiatai arrüna urria niyachücoimia. Aboma ito bama anecanatai isamutema arrüna urria, pero ñana tiene que atusi ito.

6 ¹Namanaiña bama baserebioma tacana mosorrüma, tari ane ñanauncurrüma nurria ümo bama ipiatronetorrüma. Arrtü chübaserebiopüma nurria ümoma, manitanama genterrü churriampü ümoti Tuparrü itopiquimia, y ümo ito arrüna manitacarrü osoi. ²Arrtü aboma bama mosorrü icocoromati Tuparrü, y arrübama ipiatronetorrüma isiatai, tapü mapensarama caüma ui na sane, que champü nümochequi ñanauncurrüma ümoma, itopiqui tüniyaruquitörümantoe au nürirrti Señor Jesús. Más bien tari manrrü urria niyaserebiquirrimia ümoma aübu narucurrü, itopiqui ticocoromatito Jesús bama ipiatronetorrüma. Cuasürüma ito ümoti Tuparrü. Itopiqui arrüma buenurrüma caüma ümo bama imostorrüma. Sane nauquiche anuneca te arrüna sane aübu narucurrü aemo, naqui Timoteo.

Tapü urrianca ümo monirrtai

³Aboma bama chirranrrüpüma aicocoma arrüna sane. Pero arrüna nisura aemo, ta tone arrüna ñemanauncurratoe ñanunecacarrü Señor Jesucristo. Tone uiche urria tato nosüboriqui aübuti Tuparrü. ⁴Arrübama manunecana quiatarrü chirranrrüpüma oncoimia arrüna nomirria ui nivianucurrüma, abu chipiacapüma, ni atusipü ümoma isane arrüna urapoimia. Manitanamantai y uratoquiomantai. Ui arrüna sane caüma tüboricomantai ümomantoe bama usaruquitaquí, pesabatai ümoma nipiaccarrü quiatarrü. Churriampü nurarrüma ümomantoe. Choncopümatü ümoti quiatarrü. Mapensarama churriampü ümoti quiatarrü. ⁵Arrübama manunecanama ausüratai ipiacama uratoquimia, pero chipiacapüma apensama nurria, ni atusipü ümoma arrüna ñemanauncurratoe. Ñaquiuncorrüma puerurrü acanama chama moniri ui yaserebiquirrimia ümoti Tuparrü.

⁶Abu ñemanauntu, macanaca nomirria ui numacoconauncu ümoti Tuparrü, arrtü upucununcatai ui na torrio uiti oemo. ⁷Itopiqui tücañe nauquiche maübo

usaca icu na cürrü, champü isane cuatü osoi, y chüpuerurrüpito maca isane, arrtü oconca. ⁸Sane nauquiche tari upucünuna arrtü ane uñutuburibo y usaibibo, tapü urrianca manrrü üübo. ⁹Arrübama rranrrüma aisamunemacü rricurrü, cuatü macocotorrü ümoma ui aruqui nanaiña nirrancarrüma. Ui arrüna sane mameso nisüboriquirrimia aübuti Tuparrü, y sane penecoma ümo carrticurrü. ¹⁰Ui arrüna nurrianca ümo monirri cuatü aruqui nanaiña nomünantü oemo. Aboma bama iñocotama ñacoconauncurrüma ümoti Tuparrü, itopiqui nirrancarrüma rricurrüma. Ui arrüna sane cuatü chütamampatai ümoma.

Macuansomococorrü

¹¹Pero arrücü Timoteo, aserebiquia ümoti Tuparrü. Tapü aisamute nanaiña arrüba chomirriampü, ta aisamusio arrüba nomirria. Aiña nurria, nauqui apucünuti Tuparrü acuatacä. Tapü tacürusu nacoconauncu ümoti. Tari cuasürüma aemo bama usaruquitaquí. Tapü atachea ui arrüna asioma acuatacä. Tari urria nanitaca ümoma. ¹²Tapü aiñocota arrüna natrabacaca ümoti Tuparrü y arrüna nacoconauncu ümoti. Aiña nurria, nauqui aye obi nasüboriqui esati Tuparrü ümo para siemprerrü, ta ümo itasurutüyü. Sane te tücañe urapoi isucarü sürümanama macirrtianuca. Urriampae manu nurapoi. ¹³Suraboira caüma nirrácüpucu aemo isucarüti Tuparrü, naqui uiche osüboriquia, y isucarütito Jesucristo, naqui urria ñanitararri tücañe isucarüti Poncio Pilato. ¹⁴Asai nurria. Aisamuse nanaiña arrüba bacüpucuca aemo. Tari urria napanancu, cheperrtü iñataiti tato Señor Jesucristo. ¹⁵Cuati tato arrtü tiñatai manu ñapacümuncuturrti Bae Tuparrü. Arrti Tuparrü champü tacanache nüriacarri. Tonenti naqui uiñanauncati. Arrti yüriaburrti ümo bama mayüriabuca icu na cürrü. Ane nüriacarri ümo bama bacüpuru. ¹⁶Arrti chüpuerurrüpü aconti. Champüti naqui puerurrü aürotü esati, itopiqui tarucapae nanentacarri. Champüti ñoñünrrü naqui tasaratiti. Chüpuerurrüpü basaratü ümoti. Tarucapae nüriacarri. ¡Uiñanaunati! Amén.

¹⁷Urasoi isucarü bama rricurrü, tapü vanurrüma, tapü oncomatü ümo nenarrirrimia, itopiqui chüruraupü noñenarri icu na cürrü. Manrrü urria arrtü oncomatü ümoti Tuparrü. Arrti bacheboti oemo nanaiña nurriantümo, nauqui upucünun icuata. ¹⁸Anuneca ito ümoma, nauqui aisamunema arrüna omirria. Tari ñacumananama ito nenarrirrimia ümo bama poberrü, aübu nipucünuncurrüma. ¹⁹Arrtü isamutema sane, ane ito enarriboma ñana au napese, arrüba chüpuerurrüpü aenso auna cauta chütacürusupü nisüboriquirrimia.

²⁰Arrücü Timoteo, asasatü nurria itacu na manunecatarrü, arrüna torrio aemo. Tapü ane nümoche obi ñanitararri bama manitanamantai. Arrüma namatü que manrrü tusio ümoma, abu mapancarrü. ²¹Aboma bama chümacoconaunrrüpümainqui ümoti Tuparrü itopiqui icocotama nurarrüma. Tari icunusiancanati año Tuparrü.